

FBI A TRECE MAS HENDE Y EQUIPO



Mama Beth Holloway ta sali despunta ayeranochi laat di Post di Polis na Bubali, ora a realiza cu e mucha muher no ta nan yiu.

ORANJESTAD (AAN): Diabierna anochi, e speranza di famia Holloway a bay halto, ora cu Autoridad a detene algun hende coriendo den un auto na Cumana. Un di e ocupantenan tabata un mucha muher stranhero, cu tabata

parecido na e mucha muher di 18 aña kende ta perdi.

Polis mesora a dicidi di bay cune te na Post di Recherche na Bubali pa asina famia mes bin mira si esaki por ta Natalee of no. Esaki a pone cantidad di miembro di famia acudi na

Bubali, hunto cu monton di prensa local y internacional. Pero finalmente a resulta cu e mucha muher aki no ta Natalee. Sinembargo e tin di bay duna cuenta di algun documento falso cu a worde haya den su poder.

E buskeda di Natalee a sigui sin exito riba Diabierna. Pa campaña na Santa Cruz, Ministro di Husticia a duna un conferencia di prensa den presencia di Comisario Dompig, pa anuncia algun medida cu sigur ta dirigi riba Comisario Jan van der Straten. Mas di esaki por lesa na pagina 3.

Sinembargo e solo hecho cu Comisario Dompig a presenta na un conferencia, sinta den un



Oficina Politico... a laga un sabor masha amargo den boca di varios agente policial. Sindicato di Polis mes a core tene un reunion di urgencia pa analiza e situacion sorprendente aki. Comisario Jan van der Straten ta sigui ta activamente involvi y yen energia ta buscando rond. Prensa mes a mira con hopi el a traha den e buskeda na Arashi, mientras cu 'otro' Comisario a prefera di sinta mas den auto cu airco y wak pafor. Mientras tanto, enfoko di prensa Mericano a dirigi riba e 3 hobennan stran-

hero cu a worde interroga na comienzo di siman, y kendenan ta e ultimonan cu a laga Natalee na su Hotel. Investigacion riba nan ta sigui, y no por descarta posibilidad cu nan lo worde interroga atrobe.

Informacion nobo, ta indica cu Dialuna madrugada, tabatin un di e mucha muhernan di Alabama ta landa den laman dilanti Holiday Inn pa 2'or di madrugada, cu un mucha homber Hulandes. E amiganan dado momento a yame pa e sali, y el a haci esey tambe. E amiganan aki a keda rond di piscina te 5'or di madrugada. Nan a bisa cu no a mira Natalee pasa eybando tampoco. Algun di nan a keda henter madrugada sin drumi, pesey ora nan a bay back den camber y ripara cu Natalee no tey, nan no a preocupa. Un avion yena cu equipo y experto di FBI, a ateriza Diabierna laat na Aruba, cu specialistanan den Investigacion Cientifico, y tambe den Buceo. Diadomingo mainta tin Misa Special na Aruba pa Natalee. Detaye na pagina 3 tambe.